

華嚴經普賢行願品疏卷五

唐罽賓國三藏般若奉詔譯 澄觀述疏

◎彌伽長者章

△第四彌伽長者寄生貴住。生佛法家，種姓尊貴故。文亦具六。

爾時善財童子一心隨順善知識教，正念觀彼法光明門。以清淨心深信趣入。念法威力。順佛所行。專心憶持紹三寶種。歎離欲性。念善知識，普遍觀察，照明三世。憶本大願隨順修行。以無礙心，入眾生界。常勤作意，

救護世間。於諸有為，心無倚著。觀一切法根本自性。念念流入一切智海。普遍嚴淨一切佛剎。於諸如來道場眾會，心無依住。

第一依教趣求中二。先念前友教。有十五句。初總。餘別。

如是觀察。漸次南行。至達邏比吒國。入金剛層城。周遍求覓彌伽大士。

後如是觀察下，趣求後位。

乃見其人於市肆中，處高臺上，坐師子座。十千人眾所共圍繞。廣說輪字莊嚴法門。

第二乃見下，見敬諮問。於中三。初見。

善財往詣，頂禮其足，繞無數匝，恭敬合掌。

次善財下，敬。

白言，聖者，我已先發阿耨多羅三藐三菩提心。

後白言下，諮問。於中二。先自陳發心。

而未知菩薩云何學菩薩行，云何修菩薩道。

後而未下，問法。有十三句。初二句總。次十句別。後一句結請。

云何流轉諸趣，常不忘失菩提之心。云何心得堅固，勤求佛法，無有厭倦。云何獲得清淨謙下之心，無能壞者。云何得大悲心力，恆處生死，不憚劬勞。云何得陀羅尼力，自在攝持，普門清淨。云何發生廣大智光，離諸翳障。云何得妙辯才，善巧決擇甚深法藏。云何得正念力，憶持諸佛一切法輪。云何得淨趣力，演一切法，普淨諸趣。云何得成菩薩普遍智力，於一切法種種分別，

悉能決定，了真實義。

別中，釋通橫豎。橫釋可知。豎約十地。一證發心故，常不忘失。二不誤犯故，堅求佛法。三忍度增故，清淨謙下。四進度增故，不憚劬勞。五入俗化物故，總持普門。六般若現前故，智光離翳。七方便增上故，得妙辯才。權實雙行，決擇深義。八無功無生，為正念力。一念所作，超前多倍故，憶持佛法。九居法師位，演一切法。十智度滿故，名普遍智。此十地相，文亦顯然。

唯願慈哀，為我宣說。

唯願下，結請。

△第三爾時彌伽下，稱讚授法。於中二。一讚法器。二授法門。

爾時彌伽告善財言，善男子，汝已先發阿耨多羅三藐三菩提心耶。

前中三。初審問。

善財白言，唯然，大士，我已先發阿耨多羅三藐三菩提

心。

次善財下，奉答。

彌伽遽即下師子座。由為尊重菩提心故，於善財前，五體投地，一心禮敬。從地而起，散金銀華無價寶珠，及以上妙碎末旃檀。復以雜綵無量寶衣以覆其上。復散無數殊勝光潔悅意香華，眾妙供具而為供養。

後彌伽遽即下，敬讚。於中二。一敬。二讚。今初。師禮資者，以菩提心是佛因故。能廣出生諸功德故。發心

功德品云，發心功德不可量，眾智共說無能盡故。如下慈氏廣讚勝德。法界無差別論云，禮菩提心者，如人禮白分初月，不禮滿月。以希現故，滿月由此故。故涅槃三十八云，發心畢竟二不別，如是二心先心難，自未得度先度他，是故我禮初發心。況未說法，未定師資。後授己法，方昇本座，不違重法。前三皆僧，敬俗非儀，故不爾也。

然後合掌以柔軟音而稱讚言，善哉善哉，善男子，汝乃能發阿耨多羅三藐三菩提心。

二然後合掌下，讚。於中二。先總。

善男子若有能發阿耨多羅三藐三菩提心者，則為勤求一切智智不斷佛種，則為永離一切世間凡夫種姓，則為嚴淨一切諸佛所有剎土，則為調伏一切眾生令其成熟，則為覺了一切法性出生死海，則為照解一切業種無所依著，則為勤修一切菩薩所有妙行，則為已發一切大願無有斷絕，則為隨順一切種智離欲行處，則為獲得一切菩薩堅固種姓，則為已得一切諸佛威力加持，則能明見一切三世所有差別。則為十方一切如來共所護念，則與法界一切菩薩志樂平等，則得一切賢聖咸共稱讚，則得一切梵王一心禮觀，則得一切天王恭敬供養，則得一切夜叉

王常勤守護，則得一切羅刹王隨逐侍衛，則得一切諸大龍王迎接奉事，則得一切緊那羅王歌詠讚歎，則得一切諸世間主同心慶悅。則令一切諸眾生界悉得安隱，所謂令斷一切惡趣流轉故，令捨一切諸苦難處故，令息一切貧窮根本故，令生一切人天快樂故，令得親近供養一切善知識故，令得聽聞受持諸佛廣大法故，能令修集一切菩薩菩提分法故，能令增長一切功德善法根芽故，能令熏發一切菩薩無漏智種故，能令智光普照一切差別智道故，能令究竟住於菩薩真實智地故。

後善男子下，別。於中三。一讚發心勝德。二讚發人難

遇。三結讚成益。初中三。初明因果深廣德。斯德終成，功歸初發。而汝能發，決定當成。況初後圓融，此心頓具。故上經云一切功德皆在最初菩提心中住也。次則為十方一切如來下，十王敬護德。以內有勝德故。後則令一切眾生界下，外益眾生德。並顯可知。

善男子，如是菩薩難得出世，亦難值遇。諸有所作，難識難知。能為眾生作甚難事。若得見者，倍更為難。何以故。菩薩出世與諸眾生為大利益。如父母，長養安慰令成就故。如瓔珞，莊嚴一切諸天人故。如船師，於生死海度眾生故。如屋宅，覆護一切諸世間故。如商主，

能導群生至寶所故。如赫日，智慧光明能普照故。如君主，覺法城中得自在故。如熾火，能燒眾生我愛薪故。如大雲，普霖無邊甘露雨故。如時雨，增長信等善根芽故。如船舫，運度眾生達彼岸故。如橋梁，能度眾生越生死故。如津濟，顯示一切出要道故。如風輪，能持眾生不令墮落三惡趣故。如大地，悉能增長一切眾生諸善根故。如大海，具足一切無盡福智功德藏故。如滿月，普放智光破煩惱暗施清涼故。如猛將，悉能摧伏一切魔軍令退散故。如須彌，勝智善根超出深廣生死海故。

二善男子如是菩薩下，讚發人難遇。人能具德，故難逢

遇。於中二。先總讚。後何以故下，徵釋。先徵意云，何以難遇。釋云，發心菩薩能與眾生成勝益故。以喻對法，文並可知。

爾時彌伽廣為善財稱讚顯示發菩提心大功德力。令諸眾會皆生歡喜，同聲唱言，善哉善哉，善男子，今我眾會因見勝人，得聞菩薩功德行願。踊躍歡喜，不能自持。

三爾時彌伽廣為下，結讚成益。益時會故。此段舊經所無。

是時彌伽還昇本座。從其面門放種種光，普照三千大千世界。時此世界諸大梵王，天，龍，夜叉，乾闥婆，阿脩羅，迦樓羅，緊那羅，摩睺羅伽，人及非人，如是諸王，并其眷屬。蒙光照耀，靡不來集。是時大士觀察眾心咸生恭敬，離諸諂慢，其心寂靜，志意柔順。隨其樂欲，廣為分別開示解釋輪字句品莊嚴法門。彼諸眾生聞此法已，信順悟入，皆於阿耨多羅三藐三菩提得不退轉。

第二是時彌伽還昇本座下，授己法門。於中二。先現通益物，令其目睹。後正授法要，令其聽聞。今初。昇

座，二經並在現通之後，授己法初。面門即口，顯教道流通，亦表總持須口密故。輪字句品莊嚴法門者，古德引日照三藏三解。一約字相。楞伽經中云，字輪圓滿，猶如象跡。二約所詮。盡理圓備，如輪滿足。三約勝用，謂妙音陀羅尼，有轉授義，及滅惑義。如法輪等。即輪字教法詮示莊嚴。此釋已具。今更依毗盧遮那經以廣其相。彼經第五有字輪品。經云，是遍一切處法門。謂菩薩若住此字輪法門。始從初發妙菩提心，乃至成佛，於其中間所有一切自利利他種種事業，皆得成就。如初阿字，是菩提心。若觀此字而與相應，即同毗盧遮

那法身之體。謂此阿字輪，如孔雀尾，輪相光明，圍繞行者而住其中，即是住於佛位。如有偈云，八葉白蓮一時開，炳現阿字素光色。又阿婆嚩三字，總攝三部。阿字如來部。婆字蓮華部。嚩字金剛部。隨一部中皆有五字。所謂字輪者，從此輪轉而生諸字。輪是生義。如從阿菩提字，即生四字。謂一阿字是修行輪。既已發心，必修諸行。二暗字是成菩提輪。既修行已，必證菩提。三嚙字是大寂涅槃輪。即菩提所至。四惡字是方便輪。謂涅槃大用。而阿字當中，四字繞之。從下次第右旋如輪。舉一為例，餘字準之。若修行者如是了達，則能入

於陀羅尼門。旋轉無礙，名字輪品。種種布列圓位之相，故名莊嚴。又阿等五字，前之四字，如次即是法華經中開示悟入。第五一字，法華經無，含在入中。餘如字輪品說。其字下深義，至眾藝處當廣分別。所以次前而辨斯者，入俗化物，須存有無，以字表義故。毗盧遮那經云，甚深相無相，劣慧所不堪，為化彼等故，兼存有無說。如初阿字是無生義，以顯性空。布列字相，不失於有。故云兼存。又為總持令不失故。既為醫人，亦以字輪銷伏障故。聖教中生，宜持字故。

所應作已，告善財言，善男子，我已成就妙音陀羅尼光明法門。

第二所應作已下，正授法要，令其聽聞。於中二。先標名體。後辨業用。今初。言妙音陀羅尼光明法門者，即前字輪法門。然字即字相，謂四十二字。音即音聲，即十四音，謂哀阿等。以音入字，出字無盡。一一字下，出多意義。若善妙音，窮於聲明，解萬類語言。故音字互舉，意欲相成。智慧為體，故云光明。

於一念中能分別知三千大千世界所有欲色諸天語言差別

祕密，諸龍夜叉乾闥婆阿脩羅迦樓羅緊那羅摩睺羅伽人非人等所有語言差別祕密。亦知彼彼一切眾生所有心想種種樂欲差別祕密。所謂了知色界梵王，及諸梵眾，所有心樂差別祕密。亦知欲界諸大天王，天子天女，所有心樂差別祕密。亦知龍等人及非人男女眷屬，所有心樂差別祕密。亦能知此三千大千世界一切聲聞及辟支佛所有向果各各修習，一切菩薩行願地位各各修習微細意趣差別祕密。及諸言辭分別解說辨釋文義無不明了，亦能了知三世諸佛為諸眾生演說一切甚深法海，種種言辭意趣祕密。如於一念知此世界所有眾生及諸賢聖言辭心想行願地位各各差別微細祕密。亦知東方一十百千萬億那由他無數無量無邊無等不可數不可稱不可思不可量不可

說不可說不可說諸世界中所有眾生及諸賢聖言辭心想行願地位微細祕密。南西北方四維上下各盡不可說不可說諸世界中所有眾生及諸賢聖言辭心想行願地位各各差別微細祕密。如是一切，悉能了知，無不通達。

二於一念中下，辨其業用。此廣舊經，非唯知言，亦了心念祕密法等。

善男子，我唯知此妙音陀羅尼光明法門。

第四善男子我唯下，謙已推勝。先謙已知一。

如諸菩薩摩訶薩，普能隨入一切眾生種種想行眷屬海。普能隨入一切眾生種種建立施設海。普能隨入一切眾生種種稱謂名字海。普能隨入一切眾生種種方俗語言海。

後如諸下，推勝知多。有十五句，皆妙音持差別勝相。於中二。先有四句隨俗言音。一即言因，以想取像起尋伺行而為因故。同時心所，名為眷屬。二隨方施設所用不同。三名字。四言音。

普能隨入一切諸佛甚深祕密法句海。普能隨入一切諸佛究竟最上法句海。普能隨入一切諸佛於一所緣中說一切

三世所緣法句海。普能隨入一切諸佛於一切語言中演說一切增上法句海。普能隨入一切諸佛於一切語言中演說一切上上法句海。普能隨入一切諸佛於一切語言中演說廣大差別法句海。普能隨入一切諸佛於一切語言中演說一切差別善巧調伏法句海。普能隨入一切諸佛於一切世界中演說種種咒術言辭差別祕密海。普能隨入一切世界種種眾生音聲語言際。普能隨入一切諸佛清淨法輪圓滿莊嚴際。普能隨入一切世間種種字輪普遍出生顯示諸法際。如是菩薩行智功德，而我云何能知能說。

後普能隨入一切諸下十一句，說諸佛法句從所詮別。一

詮於理智。即事而真，為深為密。猶如三德祕密之藏。又密意三密，亦名祕密。二詮菩提涅槃。下皆即一之多，總顯甚深。於中三廣，四勝，五無上，六差別，七調伏界，八咒持，九別明妙音，十輪字圓滿，十一輪字出生。上皆深廣，故並云海。後三約窮事理，故並云際。

善男子，從此南方有一聚落，名為住林。彼有長者，名曰解脫。汝往彼問，菩薩云何修集菩薩道，菩薩云何出生菩薩德，菩薩云何成就菩薩行，菩薩云何思惟菩薩法。

第五善男子下，指示後友。聚落名住林者，方便具足住，德行建立故。年耆德艾，故稱長者。於其身內現多佛境。定用自在，故名解脫。表此住位所修善根，皆為度脫一切眾生，乃至令證大涅槃故。

時善財童子蒙善知識深心誨誘。於一切智法，深生尊重。於一切善根，增益信樂。於一切佛法，倍起精勤。於一切善知識教，普加隨順。禮彌伽足，悲泣流淚，繞無量匝，戀慕瞻仰，辭退南行。

第六時善財下，戀德禮辭。

淨空法師專集網站(簡)製作

華嚴經普賢行願品末會彌伽長者章